

Xlimactiy Xcarta Huantü Tzokli

San Juan

Nac umá xlimactiy xcarta San Juan na huá lichuhuínán xlihuak huantü chunatiyá taliaksanínán xtachuhuín Dios xahua túnuj talacapaścacni. Huantü tzokli umá carta limapaścuhucán “kolutzín”, y umá kolutzín calimalkalhchuhuinij xlihuak huantü talipahuán Cristo xlacata pi ni catacañajlánílh xlihuak amakolh huantü tahuán pi Jesucristo ni huá xaxlicana ti xhínit xuanit. Hasta cahuaniy cristianos pi ni catamalaquínihl nac xhiccán huantü chuná taliaksanínantlahuán umá talacapaścacni. Chuná cumu la xapulh carta huantü tzokli San Juan, nachunatiyá calimalkalhchuhuinij cristianos pi acxtum catalapáxquihl chačum ačačum.

Huantü akstítum y lacatítum calapaxquihu chačunu chačunu

¹Aquit kolutzín Juan, luu čana lipaxúhu ccačzoknimán quin-carta xlihuak huixinín huantü calacsacnitán Dios y macxtum litamacxtupiyátit xtachuhuín Dios nac minčachiquincán. Ccahuani-putunán pi aquit luu ccapaxquiyán, y ni caj xman aquit ccapaxquiyán huata na ccapaxquiyán xlihuak amakolh huantü uú nac qui lakstipán na aya talakapasnit xtalulóktat Dios. ²Aquinín lapaxquiyáhu porque xtalulóktat Dios huantü kalhijáhu nac quinacujcán canexnicahuá quilhtamacú quincatalamán nahuán. ³Aquit clacasquín pi Quintlaticán xahua Quimpuchinacán Jesucristo cacasiculanatlahuán y cacamaxquín

xtalacapaścacni laquí akstítum nalapaxquiyátit pero lacatítum chuná cumu la caminiyán.

⁴Aquit luu čana clipaxuhuanit porque ccalakapasnit makapitzín huantü xtum cačatamacxtumiyán, xlacán luu akstítum talamánal chuná cumu la limapeksinanit Quintlaticán Dios nalatamayáhu.

⁵Natalán, huá xpalacata aquit ccalimalacapaścacayán miliputumcán pi huantü akstítum calatamáhu y lacatítum calapaxquihu chačunu chačunu. Xlihuak umá huantü ccačzoknunimán ni nalacpuhuanátit para xasasti limapeksín, huatiyá umá limapeksín huantü makán quilhtamacú pulh quinticamaxquicán. ⁶Cumu para xli čana aquinín maklhcačziyáhu pi paxquiyáhu Dios, pus na luu quincamininiyán

pi lihuana nama kantaxtiyáhu nac quilatamatcán xli mapeksín, chuná cumu la xapulhá quilhtamacú kaxpatnitátit xlacata pi akstítum calilatamáhu xtapáxquit.

Juan cahuaniy pi nitu

caticaa kskahuimín aksaninanín

⁷Luu cuentaj catlahuátit porque luu lhuhua talapulay aksaninanín huantlak makán, lixcájnít talikalhchuhuínán y ni tacanajlaputún xlacata pi Quimpuchinacán Jesús xliçana chixcú tíhua y quilatamachi nac caquilhtamacú cumu la catihua chixcú. Xlihuak huantí ni chuná tamasiyuy huak caj aksaninanín.

⁸Camininíyán cuentaj natlahuayátit laqui nitu naca liakskahuipicanátit huantu xlacán tahuán y ninama katzankayátit xtaskáhu mintascujutcán huantu aya titlahuanítatit, huata aquit clacasquín pi acxtum namakamaklhtinanátit mintaskahucán huantu Dios camalacnüninítan nacamaxquiyán huá lipaxúhu latámat huantu necxnicú lakspata.

⁹Xlihuak amakolh huantí tamasiyumánalh huantu niaj huá xtalacapistacni Jesús, huantí chuná lama ni xliçana tálama nac xlatámat Dios, pero huantí akstítum lilatamáhu huantu Jesucristo masi-

yuniit xliçana lacxtum tálama Quintlatican Dios xahua Quimpuchinacán Jesucristo. ¹⁰Para tícu naca lakanachán nac minchicán y naca li makalhchuhuini putunán túnuj talacapistacni ni xachuná huantu masiyuniit Jesús, aquit ccahuaniyán pi ni cacamamaklhtinántit y ni caxpatnitit huantu naca huani putunán, hasta ni para mininíy nacamacatiyayátit. ¹¹Porque la tachá tícu ya cristiano aya catziy huantu xlacán tahuán y chunacú lipaxúhu tamacatiyay y tatatamacxtumiy quitaxtuy pi talicatziy huantu xla liakskahuinan-tlahuán lixcájnít xtascújut.

Ahuatá huantu caxakatli lacán cristianos Juan

¹²Natalán, lhuhua ckalhiy tachuhuín huantu ccalitakalhchuhuín amputunán, pero niaj ccaztoknuni putunán, mejor clacpuhuama para Dios lacasquín ni para makas quilhtamacú naca lakanachán laqui man naca tachuhuínán y acxtum nakalhiyáhu tapaxuhuán.

¹³Xlihuak natalánin huantí na Dios calacsacniit porque macxtum talitamacxtumiy xtachuhuín huantí uú tahuilánalh, luu lipaxúhu caxakatli lacanachán.